

IEMESA

Iemesa yana kiluma Yaubada yana 'Aila'a 'waidie.

De'e letanina 'ana tokiluma 'ana wagava Iemesa. To'aseta fueidi yadi nuanua Iemesanina kumanina Iesu taina. I kilumiga Yaubada yana 'Aila'a kumanidiavo taunidi i tauyedi Iesu Keliso 'waineye, faifaidi. 'Aila'anidi vita i veveluagadi Keliso 'ana tovedumwe'ai'ai 'waidiega begaidi i miave'eve'e'elagi fwayafwaya matatabuna 'waidie. 'Atamana fueidi 'waidie i miamiani bani'odi wakawaka we'e Iemesa, tovetumaganavo i miamianiga Ielusalema 'adi to'edakumeta bwaikina. (Folova 15:13, 21:18)

De'e letanina nageneye, sauluvanidi 'ida tovetumaganavo i lubwainedaga faifaidi i veifufu. Wata i tolinuata'i 'waideye bega yada sauluva 'waidiega yada vetumagana ta na sivemagesedi. Vetumagana ma 'ana 'eba 'isa, kebu vona'ava i lubwaineni wata folova taiadi. De'e letanina 'ana 'idi side bani'odi.

Vona-vekaiwa. 1:1

Vita 'waidie ta na sosoana wata ta na vetumagana fa'alina. 1:2-8

Vewekowekoma wata ve'ai'aiwabu faifaidi. 1:9-11

Vetoketoke 'eba sailubu 'waidie. 1:12-18

Kebu nogaya'ava wata vematayakayaka taiadi. 1:19-27

Kebu ta na lau'idi tomotoga 'adi 'isa 'waidiega. 2:1-13

Kebu vetumagana'ava, wata folova. 2:14-26

Meada ta na 'isave'avinidi. 3:1-18

Fwayafwaya 'ana nuanua sakoidi wata Seitani yana nuanua sakoidi ta na vetoketoke-'liawedi. 4:1-5:6

Yada tokemaiga wata yada vetumagana 'waidie ta na tovofovi fa'alina 5:7-20

1 ¹Yau Iemesa, Yaubada wata Toveimea Iesu Keliso yadi tofolova, a na vekaiwa 'omi Yaubada yana 'Aila'a 'wa mia-ve'eve'e'elagiga 'waimie, fwayafwaya matatabuna 'waineye.

Vetumagana wata 'aseta faifaidi.

2-3 ^aEkwavo, 'ai'edi vita wata sailubu tulidi tulidi i na souyedi 'waimie, i lubwainemi 'wa na sosoana bwaikina fai vitanidi yami vetumagana 'adi 'eba kiavefa'ala. I na fa'aliga 'ami fata 'wa na tokemaigemi vita 'ifwaidi 'waidie. 4 ^bYami tokemaiganidi i na 'eno-vagata i na nagoga mulieta 'omi 'atumai'avami, yami nuanua kumagidi, kebu tamu ava'ai 'wainega 'wa na ve'ale'usa. 5 ^cWe'e 'ai'edi aitoi 'waimiega 'aseta 'wainega i na 'usaga, i lubwaineni i na velu'ui Yaubada 'waineye nika i na veleni bega 'ana fata ma yana 'aseta i na vevenua'ivina-'atumai. I na veleniga fai taunina 'ani'anivelenina wata tonuakalikali tomotoga matatabuda 'waideye kebu nuana i da lololoi. 6 ^dSiwe tutuyanina 'wa na vevelu'ui'ga tamu nani faifaina kebu 'wa na venuanaluga, ma yami vetumagana fa'alina 'wa na nuani mogitana naninina 'wa na veluagai. Egavo i vevenuanaluga bani'odi yagina kaukau i bewebewedi wata i fetofetodi. 7-8 ^eTomotoganidi bani'odi, yadi vetumagana mweadi kebu i da lubwainedi i na vo, Nani fuedi 'a na veluagadi 'Auvea 'wainega," fai i vevenuanaluga wata nuadi a'wadi, kebu tamu sai'afo ava'ai i na veluagai.

Vewekowekoma wata ve'ai'aiwabu 'adi vona.

9 ^fTovetumagana i vewekowekomaga i lubwaineni ma yana sosoana taunina i na awa'ai'aia fai Yaubada i silakai, i vagavaia i luku yana 'Aila'a 'waineye. 10 ^gWe'e tovetumagana i ve'ai'aiwabuga i lubwaineni i na sosoana fai Yaubada i kiaobuyeni nika i nuani yana 'ai'aiwabunidi nani-'avo'avovo Yaubada mataneye. To'ai'aiwabu matatabudi 'awaie i na 'a'ava 'wa da vo welavi ididi i da avuta. 11 Inala i na lakalakaga i na yayayata mosomoso ma idina i kukuve'awagi'ai i avuavuta, 'ana 'isa 'atumaina i 'ivesakoi. Wata bani'odi to'ai'aiwabu i na folofolova yana 'ai'aiwabu 'waidie tomogonina i na 'awagi'a nika i na 'a'ava.

Vetoketoke 'eba sailubu 'waidie faifaina.

12 ^h'Ai'edi aitoi 'eba sailubu i na veluagai siwe kebu i na be'uga i na tovo'ovoi fa'alina 'eba sosoana 'waineye. I sitonovi nika i vetoketokega mia 'atumaina wata miamia-vagaina i na veluagai, 'asa'aiana 'ana tutula. Tutulanina basenadi Yaubada i vona'awaufaufa 'ida 'ana tonuakalikali matatabuda faifaida. 13 ⁱ'Ai'edi tamu tomogo 'eba sailubu i na veluagai i na sakonaga faifaina, kebu i na vo, Yaubada i sisilubuku," fai kebu

^a 1:2-3 Lom 5:3-5; 1 Fit 4:13-14 ^b 1:4 Mad 5:48 ^c 1:5 1 Kin 3:7,9-12; Mad 7:7

^d 1:6 Ais 57:20 ^e 1:7-8 Iem 4:8; Luk 16:13 ^f 1:9 Iem 2:5; Iel 9:23-24; 2 Kol 6:10

^g 1:10 1 Tim 6:17; 1 Fit 5:5; Luk 12:16-21 ^h 1:12 Dan 6:1-28; Luk 6:22-23; Iem 5:11

ⁱ 1:13 1 Fit 2:11; 1 Kol 10:13

'ana fata Yaubada tamu sailubu i na veluagai sakona 'wainega, wata taunina kebu tamu aitoi i da silubuya bega i na sakona. ¹⁴ Sailubu side bani'odi. 'Ai'edi aitoi taunina yana nuanua sakoidi i na siloloi siwe 'asa'aiana taunina sailubu. ¹⁵ Yana nuanuananidi sakoidi i na vetoketoke, taunina i na tauyeni 'waineye nika i na sakona. Sakonanina nuana i na 'ewai bei i na sakosakona, i na nagoga 'wainega tomogonina i na wafaotoga. ¹⁶ Ekwavo, taunimi 'wa na 'i'isave'avinimi i na nunago tamu aitoi i na vekaliemi. ¹⁷ ^k We'e naninidi 'atumaiotogidi 'ada 'aivaita faifaina ta veveluagadiga, matatabuna i mai abamega, 'ada nuakalikali. 'Ada tonuakalikalina Yaubada, taunina abama 'adi mageta 'adi to'idewadewa, kebu i na vetuli. Inala i na lakaga nagami welavi 'wa'una bwaikina, we'e i na yayayataga 'wa'unanina i na vevesiai. Yaubada kebu bani'odi 'ai'wa'u, 'ana 'isa'isanina wata yana nuanua 'waideye 'asa'aiana bani'odi i na 'eno-vagata kebu i na vetuli. ¹⁸ 'Fai nuanuana, mia 'ivauna wata 'atumaina i veleda yana Vona tonovina 'wainega bega 'ana 'idewadewa matatabuna 'waidiega 'ida ta kumeta.

Yaubada yana Vona kebu nogaya'ava.

¹⁹⁻²⁰ ^m Ekwavo, a na vonemi 'wa na nuanuani. Kebu 'wa na veifufu-matamatayo'oga nagami 'wa na venua'ivina, we'e tomotoga 'ifwaidi i na veveifufuga bonadi 'wa na nogaidi. Wata bani'odi kebu yami nuasako i na waloga fai kebu 'ana fata nuasako 'wainega yada sauluva i na tonova Yaubada mataneyeye, nuanuana yada sauluva 'atumai'avana. ²¹ ⁿ 'Fai nuanuana yada sauluva i na tonova, sakona tulina tulina wata bunu 'ana nuanua sakoidi 'wa na bailedi, ma yami nuaobu taunimi 'wa na tauyemi Yaubada 'waineye bega yana Vona i yatoiga nuamie 'wa na vematayekeyakeni, Vonanina 'ana fata i na 'ita'ita'iemi.

²² ^o 'Ai'edi Yaubada yana Vona 'wa na nogaimo, taunimi 'wa na vevekaliemi, we'e mogitana ava'ai i vonemiga 'wa na 'i'idewadi. ²³ ^p 'Wa na 'idewadiga fai 'ai'edi aitoi i na nogaimo we'e kebu i na foloviga taunina bani'odi tamu tomogo taunina maigina 'ana 'isa i na 'iseni nigo'ita 'waineye. ²⁴ ^l I na 'isenimo siwe kebu tamu ava'ai i na 'idewaiga i na nago nika 'ana 'isanina nuana i na fani. ²⁵ ^l We'e 'ai'edi aitoi Yaubada yana Vona i na 'i'isadewai, faifaina i na vevenua'ivina nika kebu nuana i na fani i na 'i'idewai. I na 'i'idewaiga, nika wata Yaubada i na vevesauluva 'atumaina 'waineye. Yaubada yana Vonanina veimea tonovina, 'wainega i yavuda bega ma yada sosoana ta vevematayekeyakeni.

²⁶ ^p 'Ai'edi aitoi yana nuanua 'waineye i na vo, Yau totafalolo," siwe meana kebu i na 'isave'aviniga, yana tafalolo nani-'avo'avovo wata

J 1:15 Lom 6:23 k 1:17 I Ion 1:5 l 1:18 1 Fit 1:23; Ion 1:12-13 m 1:19-20 Voa 10:19; Mad 5:22 n 1:21 Kol 3:8 o 1:22 Lom 2:13 p 1:26 Same 141:3

taunina i vevekalieni. ²⁷¶Ai'edi aitoi yana tafalolo tonovina wata 'atumaina Yaubada Tamada mataneyeye, side bani'odi i na vevesauluvedi. Fovafova wata 'wabu'wabulavo vita i veveluagadiga i na 'i'ivaisedi, wata taunina i na 'i'isave'avini bega sakona kebu i na damana 'waineyeye Yaubada 'ana tovedumwe'ai'ai 'waidiega.

Kebu ta na vaie.

2 ¹¶Ekwavo, fai 'omi 'wa vetumagana Iesu Keliso 'ada Toveimea Magemagetana 'waineyeye, bega kebu i da lubwainemi tomotoga 'adi 'isa 'waidiega 'wa na vaie. ²¶Ai'edi yami va'auta 'waineyeye tomotoga 'adi 'ailuga i na luku 'waimie, tamu, 'ai'aiwabuna, 'ana kaleko 'adi 'isa 'atumaidi wata ma 'ana didikumakuma 'ana tutula bwaikina, we'e tamu, wekowekoma, 'ana kaleko 'anilabulabu'ina wata yokeyokena, bani'odi 'wa na voneyedi 'adi 'ailuga 'waidie? ³⁻⁴¶Voke 'ai'aiwabuna 'wa na ve'ililibuyeni 'wa na vo, Iama, side 'amu 'ivi 'atumaina, bei 'u na miabui," we'e tomogo i vewekowekomaga 'waineyeye 'wa na vo, Sino bei 'u na tovtovoi," 'alo 'wa na vo, Side bei 'efe'efeye 'u miabui," siwe 'asa'aiana 'akonadi 'wa vaie 'wa vena'ivina-sako.

⁵¶Ekwavo, a na vonemi, tomotoganidi i vewekowekomaga fwayefwayeye Yaubada i vena'ivinedi bega i na ve'ai'aiwabu yadi vetumagana toketokena 'wainega wata i na luku yana 'Eba Veimea 'waineyeye taiadi i na miamia. I na lukuga fai bani'odi basenadi Yaubada i vona'awaufaufa 'ana tonuakalikali 'waidie. ⁶¶Wekowekoma Yaubada mataneyeye ma 'adi nuanua we'e 'omi 'wa vo 'ako, Nani-'avo'avovo," 'wa 'ivebunumayagidi. 'Wa da nuaniga, egavo ve'isakololoyega yami mani i eloelomi wata i nunawemi 'eba vonayavuga 'waidie? Wekowekoma 'alo 'ai'aiwabu? ⁷To'ai'aiwabu mogitana, taunidi wata 'ami Toveimea Iesu Keliso 'ana wagava ma 'ana ve'ililibu i awavesakoyeni.

⁸I lubwaineda tomotoga matatabudi ta na veve'ililibuyedi bega 'ai'edi 'ada Toveimea Iesu yana veimea bwaikina 'wa na vematayakeyakeni, nani 'atumaina 'wa na 'i'idewai. Veimeanina i 'eno'eno Yaubada yana Buki 'waineyeye i vo, Emiavo 'wa na nunuakalikaliedi taunimi 'ami nuakalikali bani'odi." ⁹Siwe 'ai'edi 'wa na lau'idi tomotoga 'adi 'isa 'waidiega, tamu nuanuami, we'e tamu 'wa na vieyeni, siwe 'akonadi veimeanina 'wa geuya, 'wa sakona Yaubada mataneyeye. ¹⁰¶Wa sakonaga fai 'ai'edi Yaubada yana veimea matatabuna ta na vevematayakeyakedi we'e veimeanidi 'waidiega tamu nani siaina ta na geuyaga, siwe 'asa'aiana matatabuna ta geudi. ¹¹¶Ta 'asetai ta geudi fai Yaubada i vo, Kebu 'wa na lu'avo'avovo bunu 'ana nuanua sakoidi 'waidie," kumanina

¶ 1:27 Ais 58:6-7 ¶ 2:1 Fol 10:34; 1 Tim 5:21; Iem 2:9 ¶ 2:4 Ion 7:24 ¶ 2:5 Mad 5:3
 ¶ 2:6 Fol 16:19 ¶ 2:11 Sou 20:13-14

wata i vo, Kebu 'wa na luwewafaga.” 'Ai'edi kebu 'wa na lu'avo'avovoga bunu 'ana nuanua sakoidi 'waidie siwe 'wa na luwewafaga, 'omi veimea 'adi togeu.

¹²⁻¹³ ^w!Awaie tomotoga matatabuda ta na vonayavuga Yaubada mataneyeye, begaidi yada sauluva wata yada vona ta na 'i'isave'avinidi. Yana veimea 'adi togeu vematavuloga i na veluagai we'e egavo veimeanidi i vevematayakeyakediga yavuyavudi, Yaubada i na 'isanuakalikaliEDI. 'Ai'edi tomotoga 'ifwaidi 'wa na 'isanuakalikaliEDiga fwayefwayeye Yaubada i na 'isanuakalikalimo kebu i na veimea 'ami vematavuloga faifaina, we'e 'ai'edi kebu 'wa na 'isanuakalikaliga, kebu tamu sai'afo Yaubada i na 'isanuakalikaliemi.

Vetumagana ma 'ana 'eba 'isa.

¹⁴Ekwavo, 'ai'edi aitoi i na vo, Ma yaku vetumagana Yaubada 'waineye,” siwe yana vetumagananina kebu ma 'ana 'eba 'isaga, ava'ai 'ana 'atumaina? Vetumagananina 'wainega 'ana fata 'ita'ita'i i na veluagai? A nuani kebu tamu sai'afo. ¹⁵⁻¹⁶ ^x!Ai'edi iamu tamu tovetumagana i na lase 'alo kebu 'ana kalekoga i na vekaukau, siwe 'waineye 'u na vo, Kaiwa iaku, Yaubada i na vesauluva 'atumaina 'waimuye, 'u miamia wata a nunago, 'u na 'ani'ani wata kebu 'u na vekaukau,” vona'ava, ava'ai 'ana 'atumaina? ¹⁷Wata yada vetumagana bani'odi. 'Ai'edi vetumagana'ava kebu ma 'ana 'eba 'isaga, vetumagananina nani-'avo'avovo.

¹⁸Siwe tamu aitoi i na vo, Tomotoga 'ifwaidi i vevetumaganamo, we'e tomotoga 'ifwaidi i vevesauluva 'atumaina tomotoga 'waidie.” We'e yau a na tutuli a na vo, 'Ai'edi aitoi kebu i na 'a'aivaitaga tomotoga 'waidie kebu 'ana fata yana vetumagana i na veku. We'e yau a na vemu a vetumagana Yaubada 'waineye fai yana nuanua 'atumaidi a 'i'idewadi. ¹⁹'Omu 'u vetumagana 'u vo, Yaubada i miamia, 'aiseotogina bwaikina, kebu wata tamu,” 'u vonaga mogitana, siwe wata bani'odi yaiaina i vetumagana, ma yadi kololo i tatatava fai i 'asetai 'awaie 'adi vematavuloga i na veluagai.

²⁰'Omu kebu nuamuga. A na vemu ta na vetumaganamo Yaubada 'waineye we'e yana nuanua kebu ta na vematayakeyakeniga, vetumagananina nani-'avo'avovo. ²¹'U na nuani tubuda Ebelamo, fai natuna Aisake i tauyeni i 'aniveleneni Yaubada 'waineye bega igodi i da velomuyeni, yana sauluva tonovidi Yaubada mataneyeye. ²²'Wa 'iseni? Yana vetumagana wata ava'ai i 'idewaiga 'adi 'ailugana i folofolova, bega ava'ai i 'idewaiga 'wainega yana vetumagananina vetumagana mogitana.

^w 2:13 Mad 5:7, 6:14-15 ^x 2:15-17 Mad 25:41-45; 1 Ion 3:17 ^y 2:21 Nag 22:9-12; Ibu 11:17

²³Nika vonanina Yaubada yana Buki nageneye 'ana mogitana i souyeni i vo, Ebelamo i vetumagana Yaubada 'waineye bega i awave'atumaieni i vo, Ebelamo yana sauluva tonovidi matakuye.” Wata tamu Ebelamo 'ana 'eba 'ainana, Yaubada iana. ²⁴Bega Ebelamo 'wainega ta 'asetai yada sauluva i na tonova Yaubada mataneye kebu vetumagana 'aisena 'wainega, mogitana wata ava'ai ta na 'idewadiga 'waidiega.

²⁵Wata bani'odi vavine tolagogona 'adi wagava Leabi. Ava'ai i 'idewaiga 'wainega yadi sauluva i tonova Yaubada mataneye. Basenadi me Isileli i le'wai Leabi yadi 'awalaweye vavinenidi i 'ivaisedi, yadi tovetau'i'wala i givedi yadi vanuge mulieta i vonedi tamu 'eda 'waineamo i viladi i nagoi ediavo 'waidie. ²⁶'Ai'edi tamu tomotoga tomogo'avana kebu ma 'anu'anununaga, tomotoganina wafawafana, wata bani'odi 'ai'edi vetumagana'ava, kebu ma 'ana 'eba 'isa, vetumagananina wafawafana.

Meada nani toketokena.

3 ¹Ekwavo, 'ami 'aila'a 'wainega kebu nuanuaku fuedi i na vetove Yaubada yana Vona faifaina. 'Akonadi 'wa 'asetai 'awaie tomotoga matatabuda ta na vonayavuga Yaubada mataneye i na veimeyeda, we'e 'ima tove 'ai'edi tomotoga 'a na vekaliedi yama vona 'waidiega Yaubada yana veimea toketokena i na yatoi 'waimeye vematavuloga faifaina. ²Fueda tutuya fuedi ta vevekali, naninidi kebu tonovidiga ta 'idewadi. Siwe 'ai'edi aitoi 'ana fata meana i na 'i'isave'avini bega kebu tamu tutuya i na vekali, tomogonina 'atumai'avana, wata yana sauluva matatabuna i na 'i'isave'avinidi.

³^b'Ai'edi nuanuada 'aisaya osi ta na veimeyeni, 'awaneye kainumu ma bulavina ta na yatoi 'ana 'eba sivetovetonova, bega 'ana fata yada nuanua i na vematayakeyakeni. Kainumunina siaina, siwe 'ana fata 'wainega 'aisaya bwaikaotogina ta na veimeyeni. ⁴Wata 'wa na nuani waka bwaikaotogina, kaukau bwaikina i 'ona'onai, siwe toniwaka wayaisi siaina 'wainega 'ana fata i na liavetovetonovi bega ava'aibe bei nuanuana i nunagoga, 'waineye i na nago. ⁵^cMeada, wata bani'odi. Meada nani siaidi siwe 'waidiega 'ana fata sakona bwaikidi i na souyedi.

Wata 'wa na nuani 'ai-'ala'alata, meana siaina siwe 'wainega 'ana fata libi bwaikina i na 'alai. ⁶^dWe'e meada 'ai-'ala'alata bani'odi. Yadi 'eba mia 'awadeye, siwe sakona bwaikaotogina i sususula tomogoda matatabuna 'waidie. Meada 'wa da vo Seitani taunina i da luvetogali, bega meadanidi yadi 'ai toketokena 'wainega yada mia matatabuna i 'i'ivesakodi. ⁷'Aisaya matatabuna tomotoga 'ada fata ta na 'ivetomotomogodi, nika mogitana

^z 2:25 Ios 2:1-21, 6:17; Ibu 11:31 ^a 3:1 Fol 20:28 ^b 3:3 Same 32:9 ^c 3:5 Voa 16:27; Same 73:8-9; Voa 26:20-21 ^d 3:6 Mad 15:18-19

'akonadi 'aisaya tulina tulina, daledaledi manuga taiadi wata igana ta 'ivetomotomogodi. ⁸ ^eWe'e meada, kebu tamu aitoi 'ana fata i na 'ivetomotomogoi, nani sakoina, kiavetonova-wayoga, 'wa da vo 'eba wafa tuva bani'odi nageneye i da 'eno'eno.

⁹Meada 'waidiega yada 'Auvea Tamada ta subisubiai, siwe wata meadanidi 'waidiega tomotoga Yaubada 'ana 'idewadewa taunina 'ana 'isa'isa bani'odi, ta yagayagaidi. ¹⁰^fSubia wata manini i sousouyedi 'awanina 'aitamogana 'wainega. Ekwavo, de'e bani'odi kebu i da lubwaineni. ¹¹Kebu 'ana fata ufa-luluvuala 'aitamogana 'wainega ufa 'atumaina wata golana i na sousouyedi. ¹²Ekwavo, wata kebu 'ana fata 'ala'ai i na vuaga kalibo vuagina i na souyeni, 'alo galai i na vuaga, 'ala'ai vuagina i na souyeni, wata eyaga kebu 'ana fata i na veufaotoga. Bega kebu i da lubwaineni subia wata manini 'adi 'awa 'aitamogana 'wainega i na sousouyedi.

'Aseta vevenua'ivinina Yaubada 'wainega.

¹³^g'Ai'edi 'waimiega tamu aitoi i na vo, Yaku 'aseta bwaikina a vevenua'ivina-'atumai," i lubwaineni ma yana nuaobu yana 'asetanina 'wainega i na vevesauluva-'atumai, 'wa na 'iseni nika 'wa na ve'awamogitana. ¹⁴Siwe 'ai'edi yamu nuanua 'waineye ve'unumagigi golagolana i na 'eno'enoga wata 'aisemu 'amu wagava yana vebwaika faifaina 'u na nuanuaga, kebu 'u na vekali taunimu 'u na awa'ai'aimu 'u na vo, Yau to'aseta." ¹⁵De'e nuanuananidi igodi 'wa vo, 'Aseta," siwe kebu i da obuma abamega, we'e mogitana fwayafwaya 'ana nuanua, wata bunu 'ana nuagiva, sauluvanidi yaiaina yadi sauluva bani'odi. ¹⁶'Ai'edi ve'unumagigi wata veumokai ta na 'isedi, bei wata ve'ikwayekwayega sakona tulina tulina taiadi ta na veluagadi.

¹⁷^hWe'e 'ai'edi 'aseta vevenua'ivinina Yaubada i na veledaga, nagami yada sauluva 'atumai'avadi, mulieta ta na vevesauluva-bikana, mali tomotoga yadi nuanua ta na veve'ililibuyedi, ta na veveiana, ta na 'i'isanuakalikali mogitana wata 'asetanina vuagina ta na ve'ivaivaita, kebu ta na vaie wata kebu tamu aitoi ta na vekalieni. ¹⁸ⁱ'Ai'edi sauluva bikanega ta na veveiana 'wa da vo tamu bila ta da bakuli, mulieta vuaga sauluva tonovina i na souyeni.

Taunimi 'wa na tauyemi Yaubada 'aiseotogina 'waineye.

4 ¹^jAwale 'ifwaimi tauni'avami 'wa veve'ikwayekwayega wata 'wa vevetalaga? Fai tomogomie nuanua sakoidi nuanuadi i na vetoketoke. ²Nani 'ifwaidi nuanuami siwe kebu 'ami fata 'wa na

^e 3:8 Lom 3:13 ^f 3:10 Efe 4:29 ^g 3:13 Efe 4:1-2 ^h 3:17 Iob 28:28 ⁱ 3:18 Mad 5:9
^j 4:1 Gal 5:17

veluagadi, begaidi nuanuami luwewafa. Mali tomotoga yadi kukua faifaidi 'wa nunuagiva siwe kebu 'ami fata 'wa na 'ewadi begaidi 'wa veve'ikwayekwayega wata 'wa vevetalaga. Nani fuedi nuanuami siwe kebu 'wa da veveluagadiga fai kebu faifaidi 'wa da vevelu'ui Yaubada 'waineye. ³Siwe 'ai'edi 'wa na velu'ui Yaubada kebu i na velemiga fai yami nuanua wata taunina yana nuanua kebu taiadi i da vesala, taunimi yami 'eba sosoana 'aisedi faifaidi 'wa vevelu'ui.

⁴"Omi yami sauluva 'wa da vo vavine yadi lamoga i da baileni i da nago 'ana gaviavo taiadi i da lulu'avo'avovo. I lubwainemi 'wa da 'asetai, 'ai'edi taunimi 'wa na tauyemi fwayafwaya 'ana nuanua sakoidi 'wa na veianediga, siwe 'asa'aiana 'wa vegavia Yaubada 'waineye. 'Ai'edi aitoi fwayafwaya 'ana nani nuana i na 'ewai, kebu 'ana fata i na veiana Yaubada taiadi, i na vegavienimo. ⁵"Sauluvanina faifaina i kilumi Yaubada yana Buki 'waineye i vo,

'Anu'anunu Yaubada i veledaga nuanuana bwaikina taunida ta na tauyeda 'aiseotogina 'waineye i na 'i'isave'avinida."

Vonanina kebu 'wa na vo 'ako, Nani-'avo'avovo." ⁶"Mogitana 'ai'edi taunida ta na tauyeda tamu nani 'waineye, Yaubada i na ve'unumagigi, siwe taunina to'anivelena bwaikina fai yana Buki 'waineye i vo,

Egavo taunidi i awa'ai'aidiga Yaubada i ve'idi'idiedi, we'e tonuaobu, ma yana nuakalikali i 'i'ivaisedi."

⁷Fai tonuaobu i nunuakalikali, taunimi 'wa na tauyemi yana nuanua 'waidie. Seitani 'wa na veugeugeni nika i na dega. ⁸"Wa na vaganago Yaubada lilivaneye wata taunina i na mai lilivamie. 'Omi 'wa sakosakonaga i lubwainemi yami sauluva 'waidiega 'wa na vevunavunaga. 'Omi 'wa vevenuanaluga Yaubada faifaina, 'wa na nuavilami 'aiseotogina faifaina 'wa na nuanua. ⁹Yami sakona faifaidi i lubwainemi 'wa na nunuavita, 'wa na 'we'we'wela wata 'wa na tatainu'wanu'wa. 'Omi 'wa sososoana-'avo'avovoga wata 'wa namanamaga 'asa'aiana, 'wa na nunuavitamo 'wa na 'we'we'wela. ¹⁰'Auvea mataneye taunimi 'wa na kiaobuyemi, mulieta i na kialakaimi.

¹¹Ekwavo, kebu emiavo tovetumagana 'wa na awavesakoyedi. 'Ai'edi aitoi iana i na awavesakoyeni 'alo i na 'amalakibuyeni, siwe 'asa'aiana Yaubada yana veimea nuakalikali faifaina i na awavesakoyeni i na vo, Vekali." 'Ai'edi veimeanina 'u na 'amalakibuyeniga, 'omu kebu tovetamatayakayakaga, we'e mogitana 'wa da vo 'omu veimeanina yana toveimea. ¹²Yaubada 'aiseotogina veimea 'ana to'anivelena, 'awaie ta na vonayavuga mataneye i na veimeyeda, bega taunina 'ana fata i na 'ita'ita'ieda 'alo i na veimea ta na wafaotoga. Emiavo 'wa 'amalakibuyediga, 'wa da nuani, 'omi Yaubada?

^k 4:3 Mad 6:9-13 ^l 4:4 1 Ion 2:15 ^m 4:5 Mad 6:24 ⁿ 4:6 1 Fit 5:5; Iob 22:29
^o 4:7 1 Fit 5:8; Efe 6:11-12 ^p 4:11-12 Lom 2:1, 14:4

Kebu taunida ta na awa'ai'aida.

¹³ ^q Omi taunimi 'wa awa'ai'aimiga a na vonemi. 'Wa vonavona 'wa vo, 'Asiau 'alo 'awa'awai ta na nagoi tamu 'atamana bwaikina 'waineye yada sito ta na vetovoia bei malamala 'aitamogana ta na miamia bega mani bwaikina ta na veluagai." ¹⁴ Siwe kebu 'wa da 'asetai ava'ai 'awa'awai i na souyeni 'waimie. Budibudi ta na 'iseni, kebu tutuya manamanawenaga i na 'awa'u'umi. 'Omi wata bani'odi, yami mia fwayefwayeye 'ana vemanawe kebu 'wa da 'asetai ga. ¹⁵ 'We'e mogitana side bani'odi 'wa da voneyedi 'wa da vo, 'Ai'edi 'Auvea i na tauyeda ma yawaida ta na miamia side naninidi wata naninidi ta na 'idewadi." ¹⁶ 'We'e 'omi yami nuanua tulina, ma yami nualaka 'wa awa'ai'aimi taunimi yami nuanua faifaidi. 'Omi wata tomotoga matatabudi taiadi 'wa awa'ai'aimiga, 'wa sakona. ¹⁷ 'Ai'edi aitoi tamu sauluva 'atumaina i 'asetai i lubwaineni i da 'idewai, siwe i na bailaga, 'akonadi i sakona.

Tove'ai'aiwabu 'adi vona.

5 ¹ 'We'e 'omi 'wa ve'ai'aiwabuga a na vonemi. I lubwainemi 'wa na 'we'we'wela wata 'wa na tainu'wanu'wa fai veviga bwaikina sai'afoga i na souyedi 'waimie. ² Yami 'ai'aiwabu i mwadabu we'e 'ami kaleko 'walu'walu i 'anidi. ³ Yami mani wata yami kukua 'akonadi i sako, yadi sakonina 'wainega i ve 'omi umokaimi, kebu 'waidiega 'wa da 'a'aivaitaga. 'Ai'aiwabunidi nuami i 'ewadiga yami 'eba 'isa, 'awaie vematavuloga 'wa na veluagai 'ai-'ala'alase. Vonayavuga 'ana 'Aiata 'akonadi i velilivana we'e 'omi 'ai'aiwabu 'wa 'e'etokwau. ⁴ Yami bakula 'adi tofолоvavo kebu 'wa da tututulidiga tutulanidi i toke i vonevonemi, 'wa noganogai 'alo kebu? Yami to'aiala yadi 'we'wela 'akonadi 'Auvea Yaubada Bwaikaotogina i noganogaidi. ⁵ Yami mia fwayefwayeye 'asa'aiana nuanuami kukua bwaikaotogina, 'ani'ani 'iwana'avadi wata 'wa sososoanamo. Taunimi 'wa veve'aniami vonayavuga 'waineye i na 'ageyatoyemi. ⁶ Tomotoganidi yadi sauluva 'atumaidi 'wa vevevita-maimaigidi toveimea matadie bega yadi veimea 'waidiega 'wa luluwefafadi, taunidi 'adi 'aivaita faifaina kebu 'adi fata i na kwayegemi.

Ma yada tokemaiga Iesu ta na lulukamaseni.

⁷ 'We'e 'omi ekwavo, i lubwainemi tutuya fuedi 'wa na totokemaiga i na nagoga 'ada Toveimea Iesu i na vilai. Tobakula yadi sauluva yada 'eba 'isa. I na tokemaiga nagami i na tauvebika mulieta 'ana tutuya mogitana 'waineye i na bakula. Wata ma yadi tokemaiga i na lulukamata

^q 4:13-14 Luk 12:18-21 ^r 4:15 Fol 18:21 ^s 5:1-6 1 Tim 6:9-10; Mak 4:19; VeL 24:15; Mad 6:19-21 ^t 5:7 Gal 6:9; Ibu 10:36-37

nagami i na kumaga mogitana mulieta i na 'aiala, bega yadi fwayafwaya 'wainega 'ani'ani 'atumaidi i na veluagadi. ⁸ "Omi wata bani'odi 'wa na totokemaigemi, 'wa na tovoovoi fa'alina fai 'ada Toveimea Iesu yana vila-vaitugana sai'afoga.

⁹ "Kebu ma yami luvulewa emiavo 'wa na vebonavoluvoluyedi. 'Ai'edi bani'odi 'wa na vesauluvediga Yaubada i na veimea vematavuloga 'wa na veluagadi. Toveimeanina i le'wa-'afo'afo i na lukuma. ¹⁰ "Wa na nuani 'Auvea yana tolu'ivonavo, 'ana wagavayega i lu'ivona, taunidi yami 'eba 'isa, yadi tokemaiga vita 'waidie 'wa na vetutuyamedi. ¹¹ "Fai i vetoketoke vita 'waidie bega ta goledi tososoana. 'Akonadi Iobi valana 'wa nogai basenadiotoga vita wata veviga 'waidie i tokemaigeni, wata 'wa 'asetai ava'ai 'Auvea i 'idewai 'eba ve'a'ava 'waineye. Iobi 'aivaita bwaikina i veluagai fai 'Auvea to'isanuakalikali mogitana, ma yana nuakalikali i vevesauluva 'atumaina 'waideye.

¹² "Ekwavo, wata tamu nani bwaikaotogina a na ve 'waimie. 'Ai'edi 'wa na vona'awaufaufaga kebu tamu ava'ai 'wa na 'inanai yami vona'awaufaufa 'ana kiavetoketoke faifaina. Kebu abama 'wa na 'inanai, fwayafwaya 'alo wata tamu nani. 'Ai'edi tamu nani mogitana 'wa na 'idewaiga 'wa na vo, E'e," we'e 'ai'edi kebu, 'wa na vonamo 'wa na vo, Kebu." Kebu yami vona i na vefuega bani'odi 'wa na vo, Tamada," nika kebu vematavuloga 'wa na veluagai Yaubada 'wainega.

Velu'ui faifaina.

¹³ "Ai'edi 'waimiega tamu aitoi vita i veveluagai, i lubwaineni i na velu'ui Yaubada 'waineye. 'Ai'edi 'waimiega tamu aitoi i sososoana, i lubwaineni i na lei-subisubia Yaubada 'waineye. ¹⁴ "Ai'edi 'waimiega tamu aitoi i vigaga, i lubwaineni tovetumagana 'adi to'edakumetavo i na 'iyoanidi, i na maia, faifaina i na velu'ui Yaubada 'waineye wata bunama i na iwagi tovigana 'waineye 'ada Toveimea Iesu 'ana wagavayega. ¹⁵ "Velu'uinina ma yadi vetumagana i na velu'ui tovigana i na ve'atumai, 'ada Toveimea i na 'ive'atumaia. We'e 'ai'edi i sakonaga, nuatavuna i na veluagai. ¹⁶ "Begaidi 'aitamogana 'aitamogana yami sakona 'wa na lulu'ivoneyedi emiavo 'waidie, wata 'aitamogana 'aitamogana emiavo faifaidi 'wa na vevelu'ui bega Yaubada i na 'ive'atumaimi. Tomotoga yadi sauluva tonovidi Yaubada mataneye i na velu'uiga, yadi velu'ui kasikasisidi, ma 'adi tutula.

¹⁷ "Ilaitia tomotoga 'ida bani'odi, i toke i velu'ui nuanuana 'wei i na tova Yaubada 'ana tovedumwe'ai'ai 'waidie, nika mogitana malamala

^u 5:8 1 Tes 3:12-13; Fil 4:5 ^v 5:9 1 Kol 4:5 ^w 5:10 Mad 5:11-12 ^x 5:11 Iob 42:10-13;
1 Fit 2:19 ^y 5:12 Mad 12:36 ^z 5:13 Same 50:15; Kol 3:16 ^a 5:15 Fol 28:8
^b 5:16 1 Ion 1:9; Voa 28:13 ^c 5:17-18 1 Kin 17:1, 18:1,42,45

'aitonu wata sai'afo nagedie 'wei kebu. ¹⁸Mulieta wata i velu'ui-vaitugana nuanuana i na 'wei, nika i 'wei bega fwayafwaya 'wainega mosomoso wata 'ani'ani i souyedi.

¹⁹⁻²⁰^dEkwavo, de'e vonanina kebu nuami i na fani. 'Ai'edi aitoi 'waimiega Yaubada yana Vona Tonovina 'wainega i na vuyo, mulieta tamu aitoi i na 'ivaiseni bega i na nuavilai yana yogobalabala 'wainega, to'aivaitanina 'akonadi i 'ita'ita'ieni wafa 'wainega we'e tosakonanina nuatavuna i na veluagai sakona fuefi faifaidi.

'Asa'aiana bani'odi,

Yau Iemesa.